

解州夏縣志

解州全志卷之八 夏縣

人物

商

巫咸太戊時相子巫賢祖乙時相父子繼相商道中興其所居里舊號巫咸里後更爲商相坊今爲南商里

唐

柳奭宗元曾伯祖楷之長子父嘗使高麗卒奭迎喪哀號遠人傾慕永徽中爲中書令後貶愛州刺史顯慶四年許敬宗構奭與長孫無忌褚遂良於武后遂見殺時皆惜之

解州全志

卷之八

夏縣 人物

一

柳鎮宗元父以事母棄太常博士求爲令其後以不能媚權貴失御史權貴死復拜侍御史號爲剛直所與遊皆當世名人

柳宗元字子厚文章卓偉第進士中博學宏詞科拜監察御史順宗朝拜禮部員外郎坐王叔文黨貶永州司馬徙柳州刺史至州設教州人以化卒於官建廟羅池祀焉文與韓愈齊名有集傳世正德十年祀鄉賢

陽城字亢宗好學貧不能得書求爲集賢院吏竊書讀之六年無所不通及進士第隱中條山與弟階域常

易衣出年長不娶謂弟曰娶則間以舛姓吾不忍也
弟亦終身不娶屑榆爲粥講論不輟屢詔不起德宗
召拜右諫議大夫固辭不獲乃就初城未起搢紳想
望風采旣受命他諫官論事苛細城未肯言韓愈作
爭臣論譏之城不屑也方與二弟日延客飲居位八
年人不能窺及裴延齡誣逐陸贄乃約拾遺王仲舒
守延英閣極論延齡罪慷慨切直累日不止聞者寒
懼城愈厲上欲遂相延齡城顯語曰延齡爲相吾當
取白麻壞之哭於庭上不相延齡城力也坐是下遷
國子司業引諸生告以忠孝出爲道州刺史太學諸

生何蕃等二百人頓首闕下請畱城不得至道州治
民如治家賦稅不時觀察使數誚讓州當上考功第
城自署曰撫字心勞催科政拙考下下判官督賦至
州城自囚於獄判官驚馳入謁慰勞之遽辭去順宗
立召還而城已卒年七十贈左散騎常侍賜其家錢
二十萬官護其喪歸葬

按唐書本傳城爲定州北平人省志以北平乃漢魏
後無終陽氏望猶之瑯琊王氏范陽盧氏也城故里
以夏縣中條山爲實今考條山柳谷尙號曰陽公鄉
谷西吳村北有陽城墓嘉靖間遺跡猶存後爲河水

冲没其爲夏邑人無疑舊志列入流寓非是

宋

司馬炫舉進士試秘書省校書郎終耀州富平令以子池贈太常少卿孫光贈太子太傅龐莊敏公稱其治行士節見於張唐卿所著墓表今其石剝落不可讀蘇文忠公撰其制詞有曰篤學力行追配前人仕道難進止於一命其賢可知矣

司馬池字和中光之父少喪父家貲數十萬悉推諸父而自讀書舉進士以文章行義事眞宗仁宗爲轉運使御史知雜事三司副使歷知鳳翔河中同杭虢晉

解州全志

卷之八

夏縣 人物

三

六州以清直仁厚聞於天下由鳳翔召知諫院上表懇辭仁宗謂宰相曰人皆嗜進池獨嗜退後更戶部度支鹽鐵副使歲滿中書進名上曰是固辭諫官者眞名節士乃擢天章閣待制以光贈太師温國公初試殿廷報母亡友匿其書池心動夜不能寐曰吾母素多疾家得無異乎行至宮門徘徊不入友以母疾告遂號慟而歸宋史有傳祀鄉賢

司馬浩少攻詩以學究舉凡八上不遇遂絕意進取專治家事爲人魁岸慷慨尙義於宗族恩尤篤司馬氏累世同居口衆產寡浩竭力營贍之孀婦孤兒皆獲

其所數十年始終無怨言祖墓迫隘尊卑長幼前後積二十九喪浩於祖墓傍構餘田悉舉而葬之弟子里早孤浩識其雋異教督甚嚴其後中進士科仕至太常寺少卿以廉直著先是鄉人導涑水溉田利甚溥歲久岸益深峭水不能上田日澆薄不足輸租浩率鄉人請於令築埭下流復資其用溫國公撰墓表祀鄉賢

司馬沂其家自唐以來累世同居食指既繁貧無以贍沂幼孝謹父兄悉以家事付之勤儉自勵雖田不加廣而家無失所王荆公撰墓表稱其謹身節用以養

解州全志

卷之八

夏縣 人物

四

父母而道行於妻子祀鄉賢

司馬旦字伯康清直強敏由秘書省校書郎歷知鄭祁縣梁山軍安州治郡有大體所施設取於適理便事所在多有惠政以熙寧八年致仕歷官至大中大夫與弟光友愛尤篤凡光平昔所與論天下事旦有助焉及光被召門下侍郎固辭不拜旦引大義語之曰生平誦堯舜之道思致其君今時可而違非進退之正也光幡然就道天下方懼光之終不出及聞皆欣然曰長者之言也與弟光富弼文彥博諸賢爲眞率會衣冠偉然所至都人聚觀旦生於丙午又與程珣

諸賢爲同甲會賦詩繪像世爲盛事比唐九老云宋
史有傳祀鄉賢

司馬光字君實生而神異不喜華靡年七歲與羣兒戲
一兒墜甕中羣兒皆走公以石擊甕水迸兒得出年
二十中進士甲科通判并州仁宗嘉祐六年擢同判
尚書禮部言日食不滿分而雨不當賀帝從之是年
知諫院時儲嗣未立入對首言之帝大感動遂力贊
韓琦等定議帝始立英宗爲嗣復進三劄五規帝皆
嘉納英宗卽位兩宮爲左右讒搆有隙京師大雨水
公極言讒賊離間之罪勸帝盡孝道自是兩宮之情

解州全志

卷之八

夏縣 人物

五

漸釋治平二年加龍圖閣直學士兼侍講神宗卽位
以公爲翰林學士力辭不許未幾又爲御史中丞時
帝欲大用公拜樞密副使王安石呂惠卿力沮之公
以道不行固辭疏凡七上乃收還誥勅爲翰林學士
與范祖禹劉恕黃庭堅子康同修資治通鑑熙寧四
年以公判西京畱臺公上疏力辭久之乃從其請以
端明殿學士致仕歸洛自是絕口不言天下事築園
獨樂時與邵堯夫同寓洛中人化其德有不善曰勿
令司馬端明邵先生知公退安石惠卿輩遂專用事
變祖宗法天下騷然元豐七年資治通鑑成詔以爲

資政殿學士降詔獎諭哲宗立宣仁太后同聽政知天下苦新法首起公爲門下侍郎公以天下爲己任變新法又進爲尙書左僕射與呂公著同心輔政民懽忻鼓舞甚於更生遼人勅其邊吏曰中國相司馬矣慎無生事開邊隙在位九月而薨太皇太后爲之慟卽日與帝臨其喪贈太師温國公諡文正京師爲之罷市往弔鬻衣以致奠巷哭以過車及如夏葬送者如哭私親嶺南登州父老亦相率具祭都中四方皆畫像以祀飲食必祝焉哲宗親篆忠精粹德之碑命學士蘇軾撰文樹諸墓道理宗寶慶二年圖公像

解州全志

卷之八

夏縣 人物

六

於昭勲崇德閣著述甚富傳於世宋史有傳度宗咸淳元年從祀孔子廟庭前明錄其後訪之夏縣無人移文於浙復其家隆慶初元後裔晰自浙還夏祠墓復有世守矣

司馬里字昭遠温公再從兄父沂贈尙書都官郎中里舉進士龐籍爲鄜延經畧使奏通判鄜州州將不法里正色力爭不少假借所至有惠政終太常少卿爲人孝友寬厚容物而內守勁直善爲詩宋史有傳祀

鄉賢

司馬宣字周卿温公再從兄父浩贈衛尉卿宣以廕補

累官駕部員外郎初爲華州司戶叅軍時多滯獄宣
爲直而釋之當官公正能知小民情僞沉厚寬裕喜
愠不形性恬靜不自矜譽及卒聞者無不歎惜温公
撰墓銘祀鄉賢

司馬康字公休温公子幼端慤不妄言笑事父母至孝
博通羣書以明經上第居母憂勺飲不入口者三日
杖而後起見者哀之温公居洛土之從學者退與康
語未嘗無所得塗之人見其容止雖不識皆知其爲
司馬公之子也公修通鑑康有助焉公薨執禮如母
喪哀毀過之爲講官上疏陳前世治少而亂多祖宗

解州全志

卷之八

夏縣 人物

七

創業之艱難積累之勤勞勸君及時向學守天下大
器其言切至又言孟子爲書最純正陳王道尤宜觀
覽旣病尤力解孟子二卷會除諫議未受條具諸所
當言以待曰得一對極言而死無所恨矣及卒公卿
以至市井之人無不哀之爲人廉潔初立温公神道
碑帝遣使賜白金二千兩康以費皆官給辭不受不
聽遣家吏入京師納之乃止范祖禹爲誌其墓宋史
有傳祀鄉賢

司馬良旦長子試將作監主簿富字希道旦仲子善屬
文仕爲承議郎通判陝州事

司馬祉温公十六世孫温公後自侍郎偁南渡家會稽
至恂官大司成嘗過夏展祀恂弟軫子垚官主事聖
官御史直隸提學採來夏奉祀充博士弟子員以父
喪還越尋卒至祉父相起家進士爲比部郎至夏祭
掃慨然有卜築志後不果嘗以爲憾相四子曰初曰
祿曰法祉其季也隆慶改元祉偕初之子暉晰遵遺
訓負譜牒始至夏定居焉癸酉甲戌聯捷進士授刑
部主事歷官陝西行太僕寺少卿居鄉訓授生徒文
教頓起

司馬晰與季父祉同登癸酉鄉薦晰爲第一人邑人先

解州全志

卷之八

夏縣 人物

八

有夢觀鄉榜於城隍廟初無姓氏僅見榜首書一聯
曰功著河洛當年盛發明經史歷代宗人皆擬爲温
公後也後司馬叔姪果得同科人咸異之

解智輕財尚義司馬祉同姪晰自浙來夏智館穀六年
爲營田宅

郭連成舉人大同教諭莊浪衛教授得父母懽心

盧應議存恥之子書法自成一家張養志亦善書法費

縣知縣

解通應召言吏部選法不公降河泊所大使到任歸處
家雍睦五世同居又主簿李棠亦四世同居

者後待之加禮乃吐心腹諭以亟求講解復命任事者疑不決都城陷徽宗思樸言以爲兵部侍郎二帝將北狩又貽書請存立趙氏金人憚之挾以北去且悉取其孥趙鼎爲匿其長子偉於蜀故得免建炎登極赦至燕樸私令齎詣徽宗爲人所告金主憐其忠釋之徽宗崩奉使朱異欲先請然後制服樸曰爲臣子臨君父喪當致其哀尙何請使請而不從奈何遂服斬衰朝夕哭金主亦義而不問金命爲行臺左丞力辭而止後卒於正定詔稱其忠節顯著贈兵部尙書諡曰忠潔宋史有傳

解州全志

卷之八

夏縣 人物

九

司馬夢求僑敘州光之裔母程歸及門夫死誓不他適旌曰節婦夢求其族子取以爲後景定三年舉進士咸淳末調江陵沙市監沙市恃水爲防德祐元年潮水忽涸北兵橫遏中道都統程文亮制置使高達降夢求朝服望闕再拜自經死

劉太爲邑助教居親喪絕葷者三年司馬光稱爲今士大夫所難能作序賻禮

劉永一太弟孝廉謙謹事父母人無間言昆弟友愛居鄉里遇有睚眦啟釁者輒勸止之熙寧初巫谷水溢民多溺死永一家濱河岸曰持竿立門外見有物被

衝者獲取輒還之鄉人負債不能償者立焚其券其
高義多如此

呂圓登觀察使李彥仙之愛將金婁宿圍陝城垂破圓
以兵來援身被重創入持彥仙泣曰圍久不知公
安否今得見公死無恨方臥聞城陷遽起戰死宋史
有傳

元

忽失反蒙古雪泥臺人世居龍池河父朶忽郎佐元太
祖平金有功賜姓何氏卜居夏生二子公其長也公
雄偉勇略善騎射弱冠襲先職爲河南都帥府百夫

解州全志

卷之八

夏縣 人物

十

長值李壇亂山東遣公統兵捕之躬冒矢石與士卒
同勞苦對敵率踴躍當前鋒每戒師曰大丈夫受命
討賊捐軀報國正在今日有不如律者吾當躬斬之
以徇於是衆莫敢怠摧堅陷銳斬馘甚多一日鬪方
酣馬失只爲寇所擒寇睹公奇偉欲授以官公詈之
曰吾惟有死以謝國安肯附賊以取榮名哉遂遇害
時年三十二後以子高閭貴追封隴西郡伯

歸暘字彥溫號西雪開封祥符人暘學無師傅精敏過
登至順進士同知潁州鉏姦擊強轉國子博士繼
拜御史及入謝臺臣奏 此 南抗賊者帝曰好

事卿宜數爲之賜以上尊轉河西廉訪使累陞集賢院學士兼祭酒改禮部尙書開端本堂皇太子就學召暘爲東宮贊善未幾遷翰林直學士同修國史仍兼前職暘言師傅當與皇太子東西相向受書其屬亦以次列坐虛其中坐以待至尊臨幸不然則師道不立矣從之尋以言事不合引病歸僑居弘州徙蔚州又徙宣德皆間關避兵後以生平慕溫公爲人特來夏卜居蓬側老病家人迎之不去卒遂葬溫公墓北半里許所著有鷄肋稿藏於門人王翰家有張謙者山東臨朐人邃於理學洪武初慕歸暘來夏以薦

解州全志

卷之八

夏縣 人物

十一

授本學教諭諸士雲集卒葬歸暘墓旁

明

王翰字時舉前令仲文子仲文居官以廉稱旣致仕貧不能歸遂爲縣人翰生而清癯眉目秀整少孤鬻薪自給適浚儀歸暘寓於夏諸名士從之遊翰時時來竊聽暘門人郭極怪之旣知爲前令子引以見暘扣其所蘊知爲佳士遂得受業門下學成後結廬中條山有所得取落葉書之或風起輒飄滿澗谷中樵蘇者得之按節高歌聲振金石洪武初以經明行修辟本學訓導改平陸陞鄆陵教諭所至皆有教法永樂

初周邸聞其才名乞爲教授王素驕縱多不法翰數諫不聽因佯狂去及事敗藩臣皆獲罪翰獨無所坐久之薦爲翰林編修復以周邸事調廉州教授倭寇數千人破城入翰率諸生巷戰死之後人撫其事附比干錄翰性方正不隨俗俯仰以古聖賢爲師法臨大變無懼色喜聚書捐俸錢以市之不足雖輟衣食費不惜也故所藏經史子集至數千卷生平著述甚多祀鄉賢

藺芳字仲文由邑庠生洪武間舉孝廉授山東內黃縣知縣遷定州知州有惠政陞刑部郎中永樂初爲吉

解州全志

卷之八

夏縣 人物

十二

安知府安輯有方民甚德之吉水民詣闕言縣有銀礦遣官覆視芳獨辨其妄事遂寢尋以母喪歸終制弗起七年上復遣人驛召行在諭畱京辦事除陝西布政使八年欲北伐特擢工部右侍郎扈從北行督催糧餉夜經李陵碑下上欲知其文莫能矚芳以手捫其點畫一過成誦奏甚悉上大奇之還京上以北京宮殿狹隘命芳赴山東河南地方督理運河閘口積水行舟催運木植已坐事謫辦事官後治會通河工部尚書宋禮薦其能授工部主事十年黃河決陽武遣芳按視芳言中鹽堤當暴流之衝請加築塞又

言自中灤分導河流使由故道北入海誠萬世利又
言新築岸埽止用草束不能堅久宜編木成大困貫
椿其中實以瓦石復以木橫貫椿表牽築堤上則殺
水固堤之長策也詔悉從之其後築堤者均用其法
又以宋禮薦遷工部右侍郎行太僕卿芳經理河道
往來齊魯汴衛間見有不便民者輒疏以聞仁孝皇
后將葬治道路供頓訖卒於官諭祭營葬芳容貌魁
梧學有用不事枝詞蔓語躬行實踐事母孝凡日所
行事夕則陳於母前有未善必讓之故忠孝兩著才
幹卓越所至著績夏之名臣自司馬文正後以芳爲

解州全志

卷之八

夏縣 人物

十三

首稱焉祀鄉賢

薛賓一名貴西董里人洪武貢士累官刑部右侍郎建
文時爲北平布政司左叅政燕邸有異謀賓同左布
政使侍郎張昺密以狀聞擬先發制之小吏季友直
洩其事燕邸謀益急而賓固不知也適入見被執賓
抗辯不服燕邸以金瓜擊之落其齒遂與昺俱見殺
時有李指揮者憫其忠匿賓幼子爲己嗣後邑人司
務郭成訐其事因俱罹禍蔓延甚衆

舊志馬巒言建文時死難之臣方黃陳練諸賢皆有
專祠祀於鄉以表其烈薛大叅忠義彪炳當時而夏

人無顯達爲舉而彰之殊可憫也因從貢士中拔列人物按明史公與張曷合傳姓作謝通志本傳又作薛而見於他處亦作謝姓互有異存以俟核

裴祥永樂間貢任工科給事中初天下驛傳有馬而無驢祥奏言馬數不足用增則傷財病民添設以驢價廉而財省亦足給用文皇可其奏遂命祥巡歷酌處後以言事忤旨上方在疾中調同安知縣尋取復諫職而祥卒矣

王正字嗣宗號中條山人礪之子聰穎過人日誦千言弱冠負重名登進士授安肅縣知縣招集流亡使皆

解州全志

卷之八

夏縣 人物

十四

復業民設主祠之陞大名知府治行卓冠部院識其名於屏母喪歸民遮道泣送服除改知平涼不畏權勢韓王驕縱正繩以法尋以父喪歸致仕所著有公餘雅興牧民手鏡藏於家

郭齡極之子舉人授廣安縣威惠有聲九載陞重慶知府時洞蠻逆叛官軍屢征不下齡毅然請往諭以朝廷恩信宣慰率衆帖服畱三載臨行餽金萬鎰却弗受時重慶三年不雨齡回任抵境卽雨穀秀雙岐人心感悅後陞叅政致仕兩任俱有去思碑立祠祀焉子孫繁碩爲邑望族

郭璿字廷珪齡姪以舉人授臨洮府同知陞南康知府持躬謙抑長厚初郡多虎害璿反躬自責禱於城隍翌日虎渡江自死廟下人以爲異

張振舉於鄉授永平府同知陞臨洮知府轉甘肅行太僕寺卿優於政事所至著績進階叅政

毛深字文淵天順己卯舉人授聊城縣知縣起復任博野縣陞邳州知州調磁州歷河南府同知轉延安府知府進叅政聽訟明決民無遁情在磁州日歲凶申免稅銀十分之八路當衝 申免徭役銀二千餘兩告免萬金渠黃陵岡等夫役千餘名招還流亡三千

解州全志

卷之八

夏縣 人物

十五

餘家修學課士善政悉舉詳載磁州去思碑并建生祠祀名宦有臚菴政績錄傳於世

馬馭忱長子以進士授景州知州臺臣以道不拾遺蝗不入境奏蒙旌異後謫戍雲南以例授都指揮僉事馬騃字世用忱仲子舉進士授行人遷工科給事中疏論李廣張鶴齡大爲孝廟所賞正德初陞刑科都給事中充戊辰廷試掌卷時大臣焦芳欲子黃中爲殿魁騃取涇野呂公柎爲狀頭有附逆瑾人給諫者騃斥以無恥又自川歸與張綵父同宿官舍不交一言遂多嫌怨出爲淮安推官清獄囚理冤抑捍禦流寇

治行第一以瑾怒未釋僅轉松江府同知陞饒州知府改鄖陽知府修舉廢墜教化大行卒爲忌者所中免官歸所著有梅軒集騷爲人剛直重信義人有急難輒賑濟之不少吝如捐金歸楊俊喪代僉事沙立償宿逋諸多可傳者尙書王公崇慶爲撰墓表祀鄉賢

馬巒字子端騷仲子力學敦行慕鄉先賢溫公之爲人因公號迂叟遂自號希迂子遊邑庠知縣鍾恕欲黜柳子厚鄉賢祠巒力止之江正郎冕將言平陽諸處邊儲改本色巒移書備陳道險運艱以寢其疏巒勁

解州全志

卷之八

夏縣 人物

十六

直敢言對妻子如嚴賓待親朋以誠信事關利濟畢力爲之著作甚多藏於家子珂善楷書

張鉞弘治十五年進士由歸安知縣召拜御史正德八年出按雲南鎮守中官梁裕貪橫鉞裁抑之爲所誣逮赴詔獄卒世宗初贈太僕少卿賜祭葬

通志作璞字中善

王巨臣以舉人歷任孟津宿遷邢臺三縣知縣流賊騷亂河南孟津尤甚巨臣完城自固在宿遷值武宗南幸政務嚴急兼攝兩縣措置優裕歸田後吟咏課子罕入城市

張玫以舉人任永清縣知縣儀容魁岸初讀書卽以節

概自任在永清愛民下士鋤惡不撓有豪惡殺一家
三人者先時屢以賂免致至竟寘之法同里優人臧
賢獲幸武廟勢凌宰輔嘗謁致求一見不可得時多
其剛介

劉鳳朝體貌魁梧辭氣溫雅以舉人授新樂縣知縣浚
溝塹植榆柳嚴禦暴客邑有巨盜爲地方害前令莫
能禁鳳朝擒治之陞戶部主事歷官太僕寺少卿左
遷陝西按察司僉事所至有聲

王繼本字立之鯁直嗜學人有過輒面規無隱知縣江
洪禮重之後江巡撫山西有註誤者以金三百賂繼

解州全志

卷之八

夏縣 人物

十七

本爲之請拒弗許以貢赴選授高唐州訓導以禮化
俗居官七年引疾歸事繼母孝所著有虛齋集藏於
家

裴一諫晉公裔徙居夏萬歷間貢事親孝操行敦篤與
曹眞予友善以理學交相勵授中部訓導士風爲之
一變後補唐山教諭陞山陽知縣地瘠民貧逋逃甚
衆極意招徠流民復集療疫賑荒築垣修堤百姓繪
像祀之乞歸行李蕭然著有語錄諸集行世子孫俱
以學行傳家祀鄉賢

裴章美字中含一諫仲子萬歷戊午舉人五歲亡母哀

毀如成人事父與繼母孝謹彌篤捷鄉試邑人有持
金求關說者嚴拒之與絳州辛全以理學相叅訂中
戊謁選授永清知縣有善政告歸閉戶著書學者宗
之兄金章以孝友著弟鶴章天啟丁卯舉人善談名
理務實學俱祀鄉賢章美子可觀髫年好學從曹眞
予辛全遊早卒

秦士英恩貢昌黎知縣潔已愛民蠲漁戶官稅免廟會
例銀善斷疑獄上官推重以母病歸

裴誠蔚州訓導有賢能聲陞白河知縣恤士愛民救荒
有術

解州全志

卷之八

夏縣 人物

十八

盧學古以舉人授衡水知縣流寇之難捍賊完城陞承
天府同知攝荆門州事崇正十五年李自成圍城學
古誓死守賊環攻四日無援城陷被執罵不絕口賊
怒剗腹死子可久伏屍慟哭賊憐而釋之

姚汝明天啟辛酉舉於鄉性孝友崇正間歲大歉傾廩
賑濟立義塚座暴骼巡撫戴君恩題奏旌表後授蠡
縣令有惠政擢河間府同知遇變死節其妾任氏狗
之蠡人聞變往省歸二喪於蠡哭如私親詔贈山東
按察司僉事祀鄉賢

王昱字穉陽事親孝人咸稱爲王孝子貧而有守不苟

言笑從曹于汴遊與安邑孝廉李貞佐善貞佐任
縣昱訪焉流賊至李促昱行昱曰安趨而危去吾不
忍也城破李罵賊死李母喬亦爲賊害家人俱逃昱
獨不去賊削其耳鼻仍不去賊詰之曰令吾友也冀
得收其骸骨耳賊義之釋不殺收貞佐屍並其母葬
於邲縣之城南飄然長往不知所終

楊自升舉於鄉事繼母撫幼弟以孝友稱歷任滄州知
州時鄰境被寇殘破升獨捐俸鼓舞衆堅守城賴以全
宦歸值異荒煮粥賑饑存活甚衆

賈雲龍崇正乙卯舉人嚴州西安二府通判有異政陞

解州全志

卷之八

夏縣 人物

十九

龍安淮安二府同知濬積水入河涸出腴田數十頃
民享其利陞工部員外晉郎中

